

**ATASSUT****UPA 2017/46****Mala Høy Kúko****17.05.2017**

**Umiatsiaararsorlutik aalisartut saarullinnik bundgarninik pisarineqartunik pisarineqareerlutik aniseqqinneqartut annertussusaat pillugit nalunaaruteqartarnissaat, kiisalu nalunaarutigineqartut Pinngortitalerfimmumut atugassanngortinneqarnissaat qulakkeerniarlugu Naalakkersuisut suliniuteqarnissamik peqquneqarnissaat pillugu Inatsisartut aalajangiiffissaattut siunnersuut.**

(Inatsisartunut ilaasortaq Hans Aronsen, Inuit Ataqatigiit)

Inatsisartunut ilaasortaq Hans Aronsen, Inuit Ataqatigiit-niit siunnersuutaanut imaattumik naatumik ATASSUT-miit oqaaseqassaagut.

ATASSUT-ip politik-kimigut pingaartitariuarpaa inuussutissarsiornerup ingerlaaseqarluarnissa, matumanilu pingaarnertut inuussutissarsiuuteqarfitta aalisarnerup sutigut tamatigut nunatsinnut ineriartorfiusumik ingerlanissaa pineqarmat aamma.

Bundgarn-ersornermi qangaaniilli matumani pineqartumut pissutsit pitsaasut inerisareernikut najoqqutaralugit matumani pineqartoq immuni soqutiginaateqarpoq, tassanimi siunnerfigerusutamiiippoq aalisartut taavalu Pinngortitaleriffimmi suliaqartut suleqatigiiffissaannik inerisaaqatigiinnerunissaq.

Saarullinik bundgarn-ersornikkut aalisarneq sinerissap qanittuani ukiuni kingullerni pitsaalluinnartumik ineriartorluarpoq, taamaammallu manna pineqartoq ilaliiffigisassaavoq sutigut aalisartut biolog-illu qanoq matumunnga tunngatillugu sammivileeqatigiissinnaanerak, susassaqartunilu eqqartuiffigineqarnissaa innersuussutigissarput.

Tassuunakkut qularnanngitsumik ilinniartunik peqataatitsilluni matuma qanoq sammivilerneqarluarsinnaanerak iluaqutaajumaartussamik inerisaasoqalersinnaassammat.

Tassami aamma naluneqanngitsutut siornatigutut avataasiorluni sineriassuatsinni annertuumik saarullinniartoqanngilaq, taamaattumillu pineqartup qanoq iluaqusiigisinnaanera aamma killeqartoq takusinnaareerparput

Naggataatigullu Naalakkersuisut akissutaanni siullermi pineqartumut tapersiissaagut, tassaniimmammi siunnersuutip saqqummiunneqartup saniatigut allaffissornikkut suliaasaqarnerulernermik pilersitsissammat. Naalakkersuisullu naliliussaamatumunnga taperserlugu aamma siunnersuut pineqartoq aqputigalugu ilisimasat nutaat pissarsiarineqarsinnaasut allaffissornikkut suliaasaqarnerulernernut iluaqutaasussatut nalilerneqanngimmata.

Taamatut ATASSUT-miit naatsumik oqaaseqarluta Hans Aronsen-ip siunnersuutaa peqqissaartumik eqqartugassanngorlugu ataatsimiititaliamut susassaartumut ingerlateqinneqarnissaanut innersuussivugut.

Qujanaq!